



VISCHNAUNCA DA SIAT

Lescha da taglia

Cuntegn

	I. Disposiziuns generalas		
Art.	1	Object	2
	2	Dretg subsidiar	2
	II. Dretg material		
	3	Taglia sin las entradas e sin la facultad	2
	4	Taglia sin schischom	2
	5	Taglia sin midada da maun	2
	6	Taglia sin la quota d'ierta ed ina taglia sin donaziuns	2
	7	Subject da taglia	3
	8	Deliberaziun subjectiva da taglia	3
	9	Calculaziun da taglia	3
	10	Incassament e responsabladad	3
	11	Taglia da tgauns	4
	12	Subject da taglia	4
	13	Deliberaziun da taglia	4
	14	Calculaziun da taglia	4
	III. Dretg formal		
	15	Suprastonza communal	4
	16	Uffeci communal da taglia	4
	17	Ulteriuras autoritads	5
	18	Scadenza	5
	19	Termin da pagament	5
	20	Relasch ed amortisaziun administrativa da taglia	6
	21	Indemnisaziun per incassament	6
	IV. Disposiziuns finalas		
	22	Entrada en vigur	6

I. DISPOSIZIUNS GENERALAS

Art. 1

Object

¹ La vischnaunca da Siat impona las suandontas taglias tenor las disposiziuns dil dretg cantunal:

- a) ina taglia sin las entradas e sin la facultad
- b) ina taglia sin il gudogn entras la vendita da beins immobigliars
- c) ina taglia supplementara ed ina taglia penala sco era multas disciplinaras
- d) ina taglia sin schischom
- e) ina taglia sin midada da maun

² La vischnaunca da Siat impona las suandontas taglias tenor questa lescha:

- a) ina taglia sin la quota d'ierta ed ina taglia sin donaziuns
- b) ina taglia da tgauns

Art. 2

Dretg subsidiar

Aschilunsch che questa lescha cuntegn negina regulaziun, vegnan applicadas las disposiziuns dalla lescha davart las taglias da baselgia sco era dalla lescha cantunala da taglia mintgamai valeivel.

II. DRETG MATERIAL

Art. 3

Taglia sin las entradas e sin la facultad

¹ Las taglias sin las entradas e sin la facultad vegnan imponidas en ina procentuala dalla taglia cantunala sempli.

² La radunonza communal decide il pli tard il meins da december davart midadas dil pei da taglia per igl onn fiscal suandont.

Art. 4

Taglia sin schischom

La taglia sin schischom importa 2 ‰.

Art. 5

Taglia sin midada da maun La taglia sin midada da maun importa 2%.

Art. 6

Taglia sin la quota d'ierta ed ina taglia sin donaziuns ¹ Alla taglia sin la quota d'ierta ed alla taglia sin donaziuns ei suttamess mintga augment da facultad ch'effectuescha ina tagliasin il relasch respectivamein sin donaziun.

² Las valurs da facultad suttamessas alla taglia e la fixaziun dalla taglia sedrezzan tenor las prescripziuns cantunalas.

³ Sche l'assignaziun consista d'ina gudida ni d'ina prestaziun che serepeta, ei la valur capitalisada decisiva per la taxaziun.

Art. 7**Subject da taglia**

Obligaus da pagar taglia ei il retschevider dall'assignaziun;

- a) sch'il testader respectivamein il donatur era domiciliaus ella vischnaunca da Siat il mument da sia mort respectivamein il mument dalla condescrida dall'assignaziun; resalvau ei quella part digl augment da facultad che consista da beins immobigliars che sesanflan buca sil territori communal;
- b) sche l'assignaziun consista da beins immobigliars sin il territori communal ni en dretgs reals vid tals.

Art. 8**Deliberaziun
subjectiva da taglia**

Deliberai dalla taglia sin la quota d'ierta e dalla taglia sin donaziuns ein:

- a) il conjugal survivent;
- b) las partenarias registradas ed ils partenaris registrai;
- c) ils descendents, ils figliasters ed ils affons confidai sco era lur descendents
- d) las personas ch'ei deliberadas dalla taglia sin midada da maun tenor il dretg cantunal;
- e) ils partenaris da concubinat;
- f) ils geniturs.

Art. 9**Calculaziun
dalla taglia**

¹ La taglia importa:

- a) per il tschep dils geniturs 5 %
- b) per il tschep da tat e tatta 10 %
- c) per ils ulteriurs retscheviders 15 %

² Las deducziuns succedan tenor il dretg cantunal.

Art. 10**Incassament e
responsabladad**

¹ La taglia sin la quota d'ierta ei da pagar ord il relasch d'ierta avon sia repartiziun e vegn incassada per tut ils artavels sco era per tut ils legataris en ina suletta gada

² Plirs retscheviders d'assignaziuns stattan solidariamein buns per la taglia entochen igl import da lur augment da facultad.

³ Igl administratur dall'ierta che vegn numnaus officialmein ni dassignaus dils artavels ed igl executur dil testament stattan solidariamein buns per la taglia entochen igl import dil relasch d'ierta sco tal.

Art. 11

Taglia da tgauns

Per mintga tgaun ch'ei pli vegls che treis meins e che vegn tenius sil territori communal ei da pagar ina taglia.

Art. 12

Subject da taglia

Obligaus da pagar la taglia ei il possessur dil tgaun. Il possessur ei obligaus d'annunziar ses animals alla vischnaunca enteifer 30 dis.

Art. 13

Deliberaziun da taglia

Deliberai da pagar la taglia ein possessurs per:

- a) ils tgauns da polizia;
- b) ils tgauns da lavina;
- c) ils tgauns da menar tschocs e suords.

Art. 14

Calculaziun dalla taglia

¹ La taglia importa ad onn per igl emprem tgaun 80.00 francs, per mintga ulteriur tgaun ella medema casada 120.00 francs. La suprastonza communal ei cumpetenta d'augmentar questas tariffas entochen il dubel.

² Sch'il tgaun vegn buca tenius duront igl entir onn sil territori communal, vegn la taglia tuttina debitada per igl entir onn. Ina imposiziun pro rata dat ei buca.

³ Per tgauns che vegnan neutier da niev en vischnaunca ei il possessur deliberaus mo lu dalla taglia, sch'ei sa vegnir cumprovau, che la taglia da tgauns ei gia vegnida pagada per igl entir onn correspondent en in'otra vischnaunca.

III. Dretg formal

Art. 15

Suprastonza communal

La suprastonza communal decida:

- a) davart damondas da levgiament fiscal;
- b) davart la participaziun a cunvegns da dretg vicendeivel dil cantun en caussas da taglia sin l'ierta en sin donaziuns.

Art. 16**Uffeci communal da taglia**

- ¹ L'execuziun da questa lescha ei caussa digl uffeci communal da taglia, aschi lunsch che la vischnaunca ei cumpetenta persuerter.
- ² Igl uffeci communal da taglia ei ultra da quei cumpetents per l'execuziun dallas incumbensas che la lescha cantunala da taglia ha surdau allas vischnauncas.
- ³ La vischnaunca sa delegar a tiarzas persunas sias incumbensas tenor alinea 1 e 2.

Art. 17**Ulteriuras autoritads**

- ¹ La taglia sin las entradas e sin la facultad sco era la taglia sin beins immobigliars, la quala vegn imponida ensemen cun quellas taglias, vegnan taxadas tras l'allianza da taglia Siat.
- ² La vischnaunca da Siat sa delegar, encunter in'indemnisaziun, la taxaziun d'ulteriuras taglias all'allianza da taglia Siat.

Art. 18**Scadenza**

- ¹ Las taglias sin las entradas e sin la facultad scadan la fin digl onn fiscal.
- ² La scadenza dalla taglia sin beins immobigliars sedrezza tenor las taglias directas, sch'ella vegn incassada ensemen cun quellas.
- ³ La scadenza dalla taglia sin il gudogn entras la vendita da beins immobigliars sedrezza tenor il dretg cantunal.
- ⁴ Las ulteriuras taglias sco era las multas disciplinaras scadan cun la facturaziun.
- ⁵ Alla fin dall'obligaziun da pagar taglia en Svizra ni cun la declaraziun da concuors scada mintga taglia ni mintga multa immediat.

Art. 19**Termin da pagament**

- ¹ Cun resalva d'alineia 2 ein las taglias e las multas disciplinaras da pagar enteifer 90 dis dapi la scadenza.
- ² Il termin da pagament dalla taglia sin il gudogn entras la vendita da beins immobigliars sedrezza tenor il dretg cantunal.
- ³ La taglia sin immobigliars che vegn incassada separadamain sto vegnir pagada enteifer 30 dis dapi che la scadenza ha cumenzau
- ³ Per las taglias sin las entradas e sin la facultad sco er per la taglia sin beins immobigliars che vegn incassada ensemen cun quellas sa la suprastanza communal preveder il pagament en ratas duront igl onn che suonda igl onn fiscal.
- ⁵ Alla finiziun da l'obligaziun da pagar taglia en Svizra ni a caschun dalla declaraziun da concuors ei mintga taglia ni mintga multa da pagar

immediatamein.

**Relasch ed amortisaziun
administrativa da taglia**

Art. 20

¹Davart las damondas da relasch da taglia decida la suprastonza communal

²Davart amortisaziuns administrativas decida:

- a) Igl uffeci communal da taglia entochen igl import da 1000 francs per onn e per cass
- b) La suprastonza communal per imports che survargan la summa sura menziunada

Art. 21

**Indemnisaziun
per incassament**

La vischnaunca da Siat vegn indemnada dallas baselgias cantunales e dallas pleivs cun 2 % dallas taglias ch'ei vegnidas incassadas.

IV. Disposiziuns finalas

Art. 22

Entrada en vigur

¹ Questa lescha ei vegnida acceptada ils 04 d'avrel 2008 dalla radunonza communal. Ella entra en vigur igl 1 da schaner 2009. Ella remplazza la lescha da taglia communal dils 03 da december 2004.

² Cun l'entrada en vigur da questa lescha ein abrogadas las disposiziuns dalla vischnaunca che stattan en cuntradiziun cun ella.

Il president communal:

La canzlista communal:

Gregori Cavigelli

Alfonsina Cahenzli

Approbau dalla Regenza tenor conclus dils 03-06-2008, RB 700

Il president/A dalla Regenza:

Il cancelier cantunal:

St. Engler

Dr. C. Riesen